



CONVENIO DE COLABORACIÓN ENTRE A VICEPRESIDENCIA E CONSELLERÍA DE PRESIDENCIA, ADMINISTRACIÓN PÚBLICAS E XUSTIZA E A INSTITUCIÓN BENÉFICO SOCIAL PADRE RUBINOS

Santiago de Compostela, 22 de maio de 2017

REÚNENSE

Dunha parte, Alfonso Rueda Valenzuela, Vicepresidente e Conselleiro de Presidencia, Administracións Públicas e Xustiza, actuando en nome e representación da Xunta de Galicia, en virtude do Decreto 148/2016, do 13 de novembro, polo que se nomean os titulares dos departamentos da Xunta de Galicia, no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa presidencia.

Doutra parte Eduardo Aceña García, actuando en nome e representación da Institución Benéfico Social Padre Rubinos (en adiante Padre Rubinos) e en uso das atribucións que lle corresponden como presidente da Institución, cargo para o que foi nomeado na Asemblea Xeral extraordinaria do 18 de decembro de 2003, sendo renovado o seu nomeamento con data do 29 de outubro de 2009.

Ambas as dúas partes recoñécense mutuamente, na calidade con que cada un intervéñ, a capacidade legal necesaria para subscribir este convenio, e para tal efecto:

EXPOÑEN

Primeiro.- O Decreto 72/2013, do 25 de abril, polo que se establece a estrutura orgánica da Vicepresidencia e Consellería de Presidencia, Administracións Públicas e Xustiza, atribúelle a este departamento, a través da Secretaría Xeral Técnica, entre outras, as competencias en materia de asociacións e fundacións.

Segundo.- A Vicepresidencia e Consellería de Presidencia, Administracións Públicas e Xustiza, no exercicio das súas competencias está a desenvolver diferentes programas e accións encamiñadas a lograr o efectivo achegamento da Administración aos cidadáns. Entre outras actuacións colabora para solucionar situacións sociais problemáticas, ben directamente ou cooperando con institucións dedicadas a proporcionar apoio e prestar determinados servizos aos cidadáns carentes da capacidade para facer fronte ás súas necesidades persoais.

Terceiro.- É necesario destacar a labor realizada pola Institución Benéfico Social Padre Rubinos. Esta entidade leva a cabo programas de actuación en orde a evitar a mendicidade, proporciona axuda ás persoas que están en situación de emerxencia social e conta con servizos de escola infantil e de terceira idade destinados aos colectivos que non teñen medios económicos.





Cuarto.- A Institución Benéfico Social Padre Rubinos desenvolve a súa labor na Coruña. Esta entidade presta servizo de aloxamento de transeúntes, para evitar a mendicidade nas rúas. No caso do Centro Xerontolóxico e da Escola Infantil, préstanse servizos de asistencia aos anciáns e aos nenos que acoden a esta institución por non poder acceder a outra entidade.

Para exercer as devanditas actuacións de prevención da mendicidade, residencia da terceira idade e escola infantil, Padre Rubinos, ten que dispor dun cadro de persoal cualificado e cunha sensibilidade especial. Debido ás carencias de vocacións relixiosas, nos últimos anos a entidade tivo que proceder á contratación de profesionais que paliasen as baixas do persoal relixioso. Esta circunstancia, unida á necesidade de afrontar os gastos derivados da prestación de servizos asistenciais cada vez demandados por un maior número de persoas debido á situación de crise económica que se vive nestes momentos, xera unha descompensación entre os ingresos e gastos da dos servizos. Para que Padre Rubinos poida paliar esta situación sen que se vexa minorado o volume de servizos que presta ten que recorrer a axudas de institucións públicas ou achegas privadas.

Quinto.- Padre Rubinos é unha institución que presta servizos de carácter asistencial aos colectivos que quedan sen cobertura dos servizos sociais das distintas Administracións Públicas.

A actividade de Padre Rubinos circunscríbese a:

A) ALBERGUE DE TRANSEÚNTES:

Componse dun conxunto de servizos especializados que teñen como finalidade atender de maneira integral as necesidades das persoas sen recursos o con escaseza destes e con outras problemáticas como a falta de apoio familiar e social, problemas de saúde mental ou adicións.

Estes servizos son:

1. Servizos residenciais:

- Atención continuada (5.271 servizos no ano 2016)
- Albergue (16.121 persoas pernoctaron no ano 2016))
- Grupo de inserción (26 usuarios no ano 2016)

Tratan de cubrir as necesidades básicas deste colectivo ao tempo que se realiza unha intervención continuada, coa finalidade de lograr a autonomía persoal como primeiro paso para a integración social.

2. Servizos socioeducativos e sanitarios:

- Centros de día (ás actividades organizadas asistiron 10.177 persoas no ano 2016)
- Atención social (no ano 2016 axudouse a 25 familias)
- Enfermería (realízanse unhas 65 atencións diarias)
- Atención psicolóxica (no ano 2016 atendéronse a 13 persoas e realizáronse 51 servizos)
- Asesoramento xurídico (atendéronse ao longo do 2016 a 21 persoas).

Estes servizos teñen como finalidade o diagnóstico de necesidades, estudo de casos, deseño de itinerarios; ademais de ofrecer apoio psico social e sanitario.





3. Formación e emprego

- Taller téxtil formativo para a inclusión social (19 participantes nas convocatorias do 2016)

Imparten formación en técnicas de deseño, patronaxe e ensamblaxe téxtil co fin de capacitar profesionalmente a este colectivo e favorecer a súa inserción socio laboral.

4. Servizos asistenciais:

- Comedor social (no ano 2016 prestáronse 104.887 servizos de comedor)
- Roupeiro e duchas (no ano 2016 prestáronse 12.422 servizos de roupeiro e duchas e 358 servizos de roupeiro familiar)
- Salón de peiteado (no ano 2016 prestáronse 362 servizos)

Satisfacen as necesidades básicas de alimentación, aseo e vestiario.

B) COMPLEXO XERONTOLÓXICO:

No ano 2016 complétase cunha ocupación total das súas 146 prazas, tanto as 106 de carácter privado, como as 40 concertadas coa Consellería de Política Social da Xunta de Galicia. As solicitudes seguen aumentando as listas de espera de Residencia e Centro de Día. Este complexo ten un compoñente marcadamente benéfico social, financiando a institución unha parte moi importante do custo das prestacións.

As actividades divídense en tres áreas diferenciadas:

- Área de residencia: Onde se atenden a 3 grupos de residentes:
 - Grupo de residentes con maior dependencia
 - Grupo de residentes con deterioro cognitivo e/ou funcional leve ou moderado
 - Grupo de residentes independentes
- Área de atención continua: a 40 residentes con deterioro cognitivo e funcional grave e/ou outras patoloxías.
- Centro de día: para 40 usuarios con dependencia cognitiva e/ou funcional, de leve a grave.

C) ESCOLA INFANTIL:

Durante o curso 2016/17 a escola conta con 95 prazas ocupadas e con lista de espera nas distintas unidades que a compoñen:

- Dúas unidades de 0-1 anos cunha ocupación máxima de 8 nenos/as por aula
- Tres unidades de 1-2 anos cunha ocupación máxima de 13 nenos/as por aula
- Dúas unidades de 2-3 anos cunha ocupación máxima de 20 nenos/as por aula

Esta escola palia en certa medida a carencia de prazas de gardería para idade comprendida entre "0" e "3" anos, na zona na que está situada (Os Rosales - Labañou).

Entre os seus obxectivos está o de configurar un marco de relacións que faga posible que a escola sexa un lugar de encontro da comunidade educativa e de todos os sectores implicados no centro.





Ao igual que no Centro Xerontolóxico, conta a escola cun equipo de persoal de servizos, de persoal voluntario, de persoal docente e de persoal técnico de xardín de infancia, cunha gran formación e experiencia.

Sexto.- De acordo co establecido no artigo 26.2, da Lei 9/2007, do 13 de xuño, de subvencións de Galicia, cómpre salientar que neste convenio non son de aplicación os principios de publicidade e concorrência pública en atención ás peculiaridades da entidade, posto que a Institución Benéfico Social Padre Rubinos é o único complexo social que hai na cidade da Coruña na que se presten tódolos servizos que ofrece a Institución (Albergue de Transeúntes, Centro Xerontolóxico e Escola Infantil), Ademais, é o único que presta un servizo integral ao transeúnte, non existindo ningún outro albergue con estas características, é dicir, que oferte conxuntamente unha prestación asistencial a familias e persoas que o soliciten e que se atopen en situación ou risco de pobreza ou exclusión social, así como o financiamento das intervencións de carácter preventivo, asistencial, rehabilitador ou de integración para evitar a cronificación desta situación.

Sétimo.- A entidade cumpre cos requisitos para obter a condición de beneficiario da subvención de acordo co disposto no artigo 10 Lei 9/2007, do 13 de xuño, de subvencións de Galicia.

En consecuencia ambas as dúas partes acordan subscribir o presente convenio de colaboración con suxeición as seguintes:

GLÁUSULAS

PRIMEIRA. – OBXECTO

A través do presente convenio establécense as condicións polas que se rexerá a colaboración entre a Vicepresidencia e Consellería de Presidencia, Administracións Públicas e Xustiza e a Institución Benéfico Social Padre Rubinos, para apoiar financeiramente á entidade na realización dos servizos asistenciais que se veñen prestando.

SEGUNDA.- OBRIGAS DA INSTITUCIÓN

1. Padre Rubinos queda obrigada a destinar os fondos percibidos ao financiamento das actuacións referidas na cláusula primeira
2. Consentir expresamente a inclusión dos datos relevantes deste convenio nos rexistros públicos que proceda, conforme coa disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, dos orzamentos xerais da CA para o exercicio 2006 e artigo 16 da Lei 9/2007, do 13 de xuño, de subvencións de Galicia.
3. Dar axeitada publicidade do carácter público do financiamento das actuacións obxecto do convenio, o cumprimento de tódalas condicións e obrigas recollidas neste convenio, e o sometemento ás actuacións de supervisión e control previstas no mesmo, así como ás demais obrigas esixidas no artigo 11 da Lei 9/2007, do 13 de xuño.





4. Prestar a colaboración e facilitar tanta documentación lle sexa requirida no exercicio das funcións de control que lle corresponden á Intervención Xeral da Comunidade Autónoma, ó Consello de Contas e ao Tribunal de Cuentas.

TERCEIRA.- OBRIGAS DA VICEPRESIDENCIA E CONSELLERÍA DA PRESIDENCIA, ADMINISTRACIÓNS PÚBLICAS E XUSTIZA

A Vicepresidencia e Consellería de Presidencia, Administracións Públicas e Xustiza, aboará á Institución a cantidade de QUINCE MIL EUROS (15.000€) que se imputarán á aplicación orzamentaria 05.21.121A.481.1 (CP.: 2015/00089) dos orzamentos xerais da Comunidade Autónoma para o ano 2017.

CUARTA.- XUSTIFICACIÓN E LIBRAMENTO DOS FONDOS

A achega económica da Vicepresidencia e Consellería de Presidencia, Administracións Públicas e Xustiza realizarase nos termos requiridos no artigo 48 do Decreto 11/2009 do 8 de xaneiro, polo que se aproba o Regulamento da Lei de subvencións de Galicia, incorporando unha memoria xustificativa con indicación das actuacións realizadas e os resultados obtidos e unha memoria económica que conterá unha relación clasificada dos gastos e investimentos da actuación financiada, con identificación do acredor e do documento, o seu importe, data de emisión, as correspondentes facturas e xustificación do seu pagamento, os documentos acreditativos dos gastos realizados con medios propios ou, de se-lo caso con achegas procedentes doutras subvencións ou recursos, detallando os ingresos ou subvencións que financien a actuación obxecto deste convenio, con indicación do importe e a súa procedencia. Así mesmo incorporaranse os tres orzamentos que, en aplicación do artigo 29.3 da Lei de subvencións de Galicia, deban terse solicitado.

O representante da Institución acreditará a realización das actividades financiadas estendendo certificación do cumprimento da finalidade para a que foi concedida a axuda.

Con anterioridade á xustificación da execución da actividade presentarse unha declaración do conxunto das axudas solicitadas, tanto das aprobadas ou concedidas como das pendentes de resolución, para un mesmo proxecto das distintas Administracións Públicas competentes ou das súas entidades vinculadas ou dependentes.

Á vista desta documentación, o órgano competente da Vicepresidencia e Consellería da Presidencia, Administracións Públicas e Xustiza expedirá certificación acreditativa do cumprimento dos fins obxecto do convenio.

En todo caso, a cantidade máxima que se obriga a achegar a consellería, reducirase na mesma proporción que represente a cantidade xustificada respecto do orzamento total presentado.

Cando as actuacións obxecto do convenio fosen financiadas, ademais de coa subvención, con fondos propios ou outras subvencións ou recursos, deberá acreditarse na xustificación o importe, a procedencia e a aplicación de tales fondos ás actividades subvencionadas, de conformidade co establecido no artigo 28.6 da Lei 9/2007, de 13 de xuño, de subvencións de Galicia.





No caso de que se produza exceso das subvencións percibidas de distintas entidades públicas a Institución deberá reintegrar o exceso xunto cos xuros de demora, nos termos que establece o artigo 23 do Decreto 11/2009 do 8 de xaneiro.

Procederá o reintegro parcial ou total da subvención nos casos previstos 33 da Lei 9/2007, do 13 de xuño, de subvencións de Galicia e concordantes do Decreto 11/2009 do 8 de xaneiro.

Ao abeiro deste convenio poderán financiarse os gastos nos que incorrese a Institución, como consecuencia da realización de actuacións acordes co obxecto do convenio e que se teñan efectuado con anterioridade á sinatura do mesmo, sempre que se trate de gastos correspondentes ao actual exercicio económico.

O prazo para presentar a documentación xustificativa da subvención será dende a formalización do convenio ata o 15 de novembro de 2017.

QUINTA.- PAGOS PARCIAIS

A achega económica da Vicepresidencia e Consellería da Presidencia, Administracións Públicas e Xustiza poderá instrumentarse mediante pagamentos parciais, a solicitude da entidade, ata un máximo do 80% da contía total da achega, de acordo có disposto no artigo 62 do Decreto 11/2009 do 8 de xaneiro e 31.6 da Lei 9/2007, do 13 de xuño, de subvencións de Galicia, dentro do límite da respectiva anualidade orzamentaria e atendendo ó ritmo de execución da acción subvencionada.

Para a realización de pagamentos parciais a entidade, deberá xustificar que se realizaron actuacións relacionadas có obxecto do convenio, así como o seu pagamento. Os pagamentos parciais quedarán condicionados ó resultado da liquidación definitiva.

De acordo co establecido nos artigos 11 d) da Lei 9/2007 e 22 do Decreto 11/2009, do 8 de xaneiro, antes de efectuar o primeiro pago parcial da achega económica da Administración Autonómica, a entidade, deberá presentar unha declaración do conxunto de tódalas axudas concedidas para este mesmo fin, perante as Administracións Públicas ou outros entes públicos. Con carácter previo á tramitación do derradeiro pagamento a Institución deberá presentar unha declaración complementaria do conxunto das axudas solicitadas para a mesma actuación das distintas Administracións Públicas ou das entidade vinculadas ou dependentes das mesmas.

SEXTA.- COMPATIBILIDADE CON OUTRAS AXUDAS

De acordo co disposto no artigo 40.1, letra d) do Decreto 11/2009, do 8 de xaneiro, a achega económica prevista no presente instrumento será compatible con outras subvencións, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou e organismos internacionais

SÉTIMA.- SEGUIMENTO DO CONVENIO

Para facilitar o seguimento e cumprimento do convenio, constituirase unha comisión mixta paritaria, integrada pola Secretaria Xeral Técnica da Vicepresidencia e Consellería da Presidencia, Administracións Públicas e Xustiza e o Presidente da Institución, ou persoas que designen no seu nome, e un representante máis de cada unha das partes.





A comisión mixta ditará as súas propias normas de funcionamento, debéndose reunir cando o solicita algunha das partes.

As súas funcións serán:

- Interpretación do convenio
- Proposta, se é o caso, de addendas
- Intervención previa á resolución por incumprimento
- Coordinación das funcións das dúas administracións
- Calquera outras relacionadas co desenvolvemento deste convenio

OITAVA.- PUBLICIDADE

Este convenio será obxecto de publicación de acordo co previsto na Lei 1/2016, de 18 de xaneiro, de transparencia e bo goberno da Administración pública galega. Así mesmo, incluírase no Rexistro Público de Axudas, Subvencións e Convenios, de conformidade co Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de presupostos xerais da Comunidade Autónoma para o ano 2006, e artigo 16 da Lei 9/2007, do 13 de xuño, de subvencións de Galicia.

As partes asinantes do convenio manifestan o seu consentimento para que os datos persoais que constan neste convenio, así coma o resto das especificacións contidas no mesmo, poidan ser publicados no Portal da Transparencia e Goberno Aberto.

NOVENA.- RESOLUCIÓN

O presente convenio resolverase:

- a) Por incumprimento total ou parcial dalgunha das estipulacións que o regulan.
- b) Polo transcurso do tempo estipulado sen que se culminen as actividades obxecto da axuda.

De resolverse o convenio, a Vicepresidencia e Consellería da Presidencia, Administracións Públicas e Xustiza poderá, no seu caso, esixir o reintegro das cantidades achegadas. Igualmente, de conformidade có disposto no artigo 17.3 da Lei 9/2007, do 13 de xuño, procederá o reintegro do exceso percibido no suposto de que o importe da axuda, illada ou en concorrencia con outras subvencións ou axudas, ingresos ou recursos, supere o custo da actividade subvencionada.

DÉCIMA. – XURISDICIÓN

O presente convenio ten natureza administrativa e as discrepancias que xurdan pola súa aplicación serán resoltas, previo informe ou proposta da comisión de seguimento, pola Vicepresidencia e Consellería de Presidencia, Administracións Públicas e Xustiza, quedando as partes suxeitas á xurisdición contencioso - administrativa para a resolución de calquera conflito que puidese xurdir na súa aplicación.





DÉCIMO PRIMEIRA. – VIXENCIA

A vixencia do presente convenio estenderase dende a sinatura ata o cumprimento, polas partes, dos deberes asumidos. En ningún caso excederá do 30 de decembro de 2017.

DÉCIMO SEGUNDA. - NORMATIVA APLICABLE

O presente convenio rexerá polo disposto na Lei 9/2007, do 13 de xuño, de subvencións de Galicia e no Decreto 11/2009 do 8 de xaneiro, polo que se aproba o Regulamento da Lei 9/2007, de 13 de xuño de subvencións de Galicia.

E en proba da súa conformidade, as partes comparecentes asinan o presente convenio por duplicado exemplar, no lugar e data sinalados no encabezamento.

O vicepresidente e conselleiro
de Presidencia Administracións Públicas
e Xustiza



Alfonso Rueda Valenzuela

O presidente da Institución Benéfico
Social Padre Rubinos

INSTITUCIÓN
BENÉFICO
SOCIAL
PADRE RUBINOS
CIF: G15074743
Ronda Outeiro, 626 - 15011 A CORUÑA
TEL: 981 20 11 22 - FAX: 981 27 35 50
Eduardo Aceña García